



10. september 2013

Inatsisartut suleriaasianni § 37 naapertorlugu matumuuna Naalakkersuisunut apeqquteqaateqarpunga:

1.

Aatsitassarsiornermut Inuussutissarsiornermullu Naalakkersuisup eqqarsaatersuutigaa Kuannersuarni aatsitassarsiornermi avatangiisinut sunniutissat pillugu nalunaarusiaq Narsami innuttaasunit taasissutigineqassasoq. Tunngavilersuutit sorpiaat pissutigalugit nunatsinni innuttaasut avatangiisinut sunniutissat pillugit tusarniarneqassanngillat?

2.

Avatangiisinut sunniutaasussanik misissuinerup ataatsip innuttaasunut taasisitsissutiginiarneqarnera sunik siunertaqarnersoq takujuminaappoq. Taasisitsinerup inerneru sumut atorniarneqarpa ? Avatangiisinut sunniutaasussanik misissuineq akuerineqanngippat, taava suliniut tamarmi itigartinneqassava? Imaluunniit misissuineq suliarineqaaqqissava? Avatangiisinut sunniutaasussat pillugit nalunaarusiami immikkoortoq sorlerpiaq naaggaartunit naaggaarneqarnersoq Naalakkersuisut qularnanngitsumik ilisimassavaat?

3.

Siunnersuutaasoq ileqqorisassanut maligassanngussava, tassa suliniutit allat aamma pillugit avatangiisinut sunniutissanik misissuinerit innuttaasunit taasissutigineqartalissappat? London Miningip avatangiisinut sunniutaasussanut nalunaarusiaa Nuummi innuttasunit taasissutigineqassava?

(Inatsisartuni ilaasortaq, Naaja H. Nathanielsen, Inuit Ataqatigiit)

Tunngavilersuut

Aallakaatitassiami "Akissut"-mi 30-augustimeersumi Aatsitassarsiornermut Inuussutissaqarnermullu Naalakkersuisoq isummanik assigiinngitsunik aatsitassarsiornermi inatsimmi malittarisassanik atuuttunik pingaarutilimmik

allannguisunik saqqummiussivoq, taakkulu innuttaasut akornanni oqallisigineqarnissaat pissusissamisoorpoq.

Aatsitassarsiornermut naalakkersuisup nalunaarutigaa eqqarsaatersuutigalugu Narsami GME-mit inatsisit naapertorlugit avatangiisinut sunniutaasussat misissornerannit nalunaarusiaq innuttaasunut taasisitsissutiginiarlugu. Avatangiisinut sunniutissanik misissuinermik nalunaarusiap ersersittussaava suliniutit avatangiisinut sunniutaat. Inatsisit naapertorlugit aatsitassarsioqatigiit aatsitassarsiortoqalissagaluarpat immikkut ilisimasalinnut avatangiisinut sunniutissat nalunaarusiortittussaavaat.

Nutaarluinnaavoq nalunaarusianut tamakkiisunut innutaassanik tasisitsisarneq. Nalunaarusiat pillugit innuttaasunik taasisitsinerit suliniutinut tamakkiisunut isummernissanut atorneqarsinnaagunangillat. Taamaattumik pingaaruteqarpoq paasissallugu taasisitsiniarneq sumut atorniarneqarnerseq aatsitassarsiornermilu periutsinut nutaatut taaneqarsinnaanersaq.

Apeqqutigineqartut tamarmik ullut sulliviusut qulit qaangertinnagit akereerneqarnissaat piumasaraara.